

20 SEP 2002

Belanjawan-Belia

PROGRAM RAKAN MUDA GUNA PENDEKATAN BARU ATASI MASALAH SOSIAL

KUALA LUMPUR, 20 Sept (Bernama) -- Program Rakan Muda yang diwujudkan oleh Kementerian Belia dan Sukan akan dipertingkatkan supaya lebih berkesan dan melibatkan lebih ramai belia.

Perdana Menteri Datuk Seri Dr Mahathir Mohamad ketika membentangkan Belanjawan 2003 di Parlimen hari ini berkata kerajaan telah memperuntuk RM12.3 juta bagi tujuan itu agar program yang bakal dirangka mampu menerapkan nilai-nilai positif di kalangan belia negara.

Katanya, golongan belia merupakan generasi pelapis yang akan meneruskan kesinambungan perjuangan memartabat dan mendaulatkan negara.

"Golongan berkenaan perlu diperlengkap dengan semangat juang membina negara serta kemahiran dan pengetahuan bagi membolehkan mereka memainkan peranan utama dalam arus pembangunan negara.

"Program seperti latihan kepimpinan, bina semangat dan jati diri akan dilaksanakan, di samping menyediakan belia kita dengan kemahiran dan pengetahuan, terutamanya dalam bidang ekonomi berasaskan pengetahuan," katanya.

Bagi tujuan itu, kata Dr Mahathir, pembangunan usahawan muda juga akan dipertingkat bagi membolehkan lebih ramai golongan belia yang berkecimpung dalam dunia perniagaan dilahirkan.

Katanya ini akan dilaksanakan menerusi peruntukan berjumlah RM500,000 yang disediakan untuk membangunkan Komuniti Belia Perdagangan dan Perindustrian.

"Program Usahawan Komputer juga akan dilaksanakan untuk melahirkan seratus usahawan berskala kecil dalam perniagaan komputer sepanjang tahun 2003," katanya.

Kerajaan juga akan memberikan kemudahan pinjaman berjumlah RM50,000 melalui Tabung Ekonomi Belia dan seramai 20,000 belia di seluruh negara dijangka memperoleh manfaat daripada program ini.

Sementara itu kira-kira 20,000 lepasan sekolah yang menunggu keputusan peperiksaan Sijil Pelajaran Malaysia (SPM) juga akan dilibatkan dengan program khidmat sosial negara yang digubal khusus untuk membentuk generasi belia yang berketrampilan.

"Sebanyak RM11 juta disediakan untuk tujuan ini agar golongan yang terlibat mampu bergerak sebagai generasi yang bersemangat patriotik di samping mengisi masa lapang dengan berfaedah," kata Dr Mahathir.

-- BERNAMA

SOP MFJ NMO